

REGULAMENTO DE FUNCIONAMENTO DO PUNTO LIMPO DE ARZÚA.

TÍTULO I.- DISPOSICIÓNS XERAIS.

ARTIGO 1.- OBXECTO E ÁMBITO DE APLICACIÓN.

1. O presente regulamento ten por obxecto regular as actividades relacionadas coa posta en marcha e funcionamento do Punto Limpo do termo municipal de Arzúa, as súas instalacións, elementos e mobiliario.

2. A titularidade e competencia do Punto Limpo é municipal e estará regulado segundo as disposicións legais e regulamentarias que existen sobre a materia.

3. Para a explotación do Punto Limpo o Concello poderá acudir a calquera das formas de xestión directa ou indirecta establecidas na lexislación vixente.

ARTIGO 2.-DEFINIÇÕES.

1. O Punto Limpo de Arzúa é unha instalación situada na Rúa dos Carpinteiros, do Parque Empresarial de Arzúa, onde se efectúa a recepción, previamente seleccionados, de certos tipos de residuos domésticos, que pola súa natureza non son obxecto habitual do servizo de recollida de residuos urbanos. Constitúe, por tanto, un sistema de recollida selectiva, sendo un centro de recepción, almacenaxe, selección e valoración dos residuos municipais que non teñan canalización de recollida diaria, nin domiciliaria.

2. En ningún caso se trata dun vertedoiro, senón dun lugar onde se almacenan temporalmente os residuos para ser, posteriormente, trasladados a xestores autorizados.

3. A instalación ten as seguintes características: recinto pechado perimétralmente na súa totalidade. O acceso ao público conta cun posto de información ao usuario e de vixilancia. A entrada conducirá á plataforma superior onde están situados os diferentes contedores para cada un dos residuos, con indicación expresa mediante sinais consistentes en carteis situados xunto a cada contedor; así como a plataforma inferior, destinada a facilitar a retirada dos contedores de gran tamaño. Conta cunha zona cuberta, almacén de residuos perigosos, onde se depositan certos residuos especiais. A zona de depósito dos residuos dispón de espazo suficiente para realizar as actividades de descarga de residuos, podendo manobrar correctamente, tanto os vehículos particulares como os vehículos recolletores dos residuos.

ARTIGO 3.- OBXECTIVOS.

O sistema de recollida a través do Punto Limpo responde a varios obxectivos:

1. O obxectivo fundamental é servir aos cidadáns como centro de achega voluntaria para a recollida selectiva dos residuos producidos no ámbito domiciliario.

2. Sensibilizar aos cidadáns respecto da separación e recuperación dos residuos.

3. Evitar o vertido incontrolado dos residuos de gran tamaño (electrodomésticos, mobles, colchóns...) que non poden ser eliminados por medio dos servizos convencionais de recollida de lixo.

4. Evitar o vertido de entullos e outros no medio natural, rural e urbano, do termo municipal de Arzúa.

5. Separar os residuos perigosos que se xeran nos fogares (aceites, pinturas, fluorescentes, radiografías...), cuxa eliminación conxunta co resto do lixo urbano ou mediante o vertido á rede de saneamento supón risco para os operarios destes servizos, pode danar as instalacións de tratamento ou a súa eliminación contribúe á contaminación do ambiente.

6. Aproveitar aqueles materiais contidos nos residuos urbanos que poden ser reciclados directamente e conseguir, con isto, un aforro en materiais e en enerxía, así como tratar e/ou eliminar residuos.

ARTIGO 4.- SERVIZOS QUE PRESTA O PUNTO LIMPO.

Os servizos que presta o Punto Limpo de Arzúa son os seguintes:

1. Recepción de residuos domésticos previamente clasificados polo usuario, para o seu posterior transporte aos lugares axeitados para o seu tratamento.

2. Control da procedencia, cantidade e natureza dos residuos que se depositan.

3. Envío destes residuos a xestores autorizados, para o seu tratamento.

4. Mantemento e xestión das instalacións pertencentes ao Punto Limpo.

4. Colaboración coa Dirección Xeral de Avaliación Ambiental para o estudo e seguimento do nivel de concienciación dos cidadáns e do uso que se está a facer dos Puntos Limpos de Galicia, enviando relacións periódicas do volume de cada tipo de residuo recollido no Punto Limpo.

TÍTULO II.- IDENTIFICACIÓN E XESTIÓN DE RESIDUOS.

ARTIGO 5.- TIPOLOXÍA DOS RESIDUOS.

1. Son recursos admisibles no Punto Limpo do Concello de Arzúa os que se relacionan deseguido:

A) Comúns:

- Vidro.
- Papel.
- Cartón.
- "Bricks", latas, envases lixeiros.
- Poda e restos vexetais.
- Madeiras.
- Restos metálicos do fogar: tixolas, potas... (aluminio, ferro, cobre, bronce, aceiro inoxidable...).
- Plásticos.
- Plásticos agrícolas.
- Têxtils: roupa, calzado....

B) Voluminosos:

- Electrodomésticos sen gas CFC: lavadoras, cociñas, quentadores de auga, aparatos de música, ordenadores....

- Utensilios, mobles, colchóns, somieres, caixas, portas e marcos....
- Entullos de pequenas obras no fogar.

C) Tóxicos e perigosos:

- Aceites vexetais de cociña e aceites minerais.
- Baterías.
- Disolventes, pinturas e vernices.
- Pilas.
- *Sprays* / aerosois.
- Radiografías.
- Fluorescentes.
- Electrodomésticos con gas CFC: frigoríficos e conxeladores.
- Televisores e pantallas de ordenadores.
- Cartuchos de fotocopiadora e impresora.

2. Son recursos non admisibles no Punto Limpo do Concello de Arzúa os que se relacionan deseguido:

- Materiais sen clasificar.
- Materia orgánica.
- Residuos infecciosos, clínicos, biosanitarios ou citolóxicos.
- Residuos radioactivos (pararraios,...).
- Residuos procedentes da actividade comercial ou industrial
- Residuos procedentes de actividades agrícolas ou gandeiras.
- Residuos xerados por actividades mineiras ou extractivas.
- Produtos procedentes de comisados.
- Pneumáticos.
- Medicamentos ou envases dos mesmos.
- Recipientes voluminosos metálicos ou plásticos de aproximadamente 25 litros ou superiores que contivesen produtos tóxicos ou perigosos.
- Animais mortos: a pesar de seren considerados como residuo urbano, os animais de compañía mortos réxense especificamente pola normativa existente en materia de Subprodutos Animais non destinados ao consumo humano Regulamento (CE) 1774/2002 do Parlamento Europeo e do Consello, do 3 de outubro de 2002, polo que se establecen as normas sanitarias aplicables aos subprodutos animais non destinados ao consumo humano.
- Calquera outro residuo que non se enumere na lista de recursos admisibles, e que sexa facilmente identificable.

3. Formas de presentación dos residuos:

Para a recollida dos residuos mencionados anteriormente, estes deben entregarse perfectamente separados, nunca mesturados e seguindo unhas normas de presentación, que son as seguintes:

A) Papel e cartón: as caixas de cartón deberanse abrir e comprimir para reducir o volume dos residuos. Así mesmo, o papel deberase presentar en bolsas ou caixas cerradas para evitar o espaxamento.

B) Vidro: fluorescente e cristais varios; os residuos de cristais deberan acondicionarse de maneira que se evite a súa rotura e poida ocasionar riscos de seguridade para as persoas encargadas da manipulación dos residuos.

C) Pilas: deberanse separar os diferentes tipos de pilas segundo a súa natureza.

D) Entullos: debido a natureza destes residuos, deberanse presentar en sacos ou bolsas de plástico cerradas de 25 Kg máximo.

E) Aceites vexetais e minerais: deberanse presentar en garrafas ou botellas de plástico tomando as medidas necesarias para evitar derrames, almacenándoos de maneira separada segundo a súa natureza.

F) Plástico agrícola: presentarase libre de restos orgánicos e debidamente pregado para reducir o seu volume.

G) Poda e restos vexetais: na medida do posible a lonxitude das pólas non excederá dun metro.

H) Disolventes, pinturas e vernices: prohíbese a mestura destas substancias, evitarase o seu vertido en caso de transvasamento.

I) Electrodomésticos con gas CFC: entregaranse sen que se produza a rotura do circuíto de refrixeración.

K) Têxtils: entregarase a roupa sen botóns nin cremalleiras.

4. Cantidade máxima por usuario:

Para evitar a utilización do Punto Limpo como centro de xestión de residuos industriais, regúlase o número e peso máximo dalgúns do residuos que se aceptan, deste xeito os usuarios non poderán depositar cantidades superiores ás seguintes:

RESIDUOS COMÚNS	CANTIDADE MÁXIMA
Vidro	Capacidade do colector
Papel	Capacidade do colector
Cartón	Capacidade do colector
"Bricks", latas, envases lixeiros	Capacidade do colector
Poda e restos vexetais	Capacidade do colector
Restos metálicos do fogar: tixolas, potas, ... (aluminio, ferro, cobre, bronce, aceiro inox., ...)	50 Kg./mes
Plásticos	Capacidade do colector
Plásticos agrícolas	Capacidade do colector
Têxtils: roupa, calzado...	25 Kg./ano

RESIDUOS VOLUMINOSOS E PERIGOSOS	CANTIDADE MÁXIMA
Electrodomésticos sen gas CFC: lavadoras, cociñas, quentadores de auga, aparatos de música, ordenadores...	2 de cada clase/ano
Utensilios, mobles, colchóns, somieres, caixas, portas e marcos...	6 de cada clase/ano,
Entullos de pequenas obras no fogar	100 Kg./mes
Aceites vexetais de cociña e aceites minerais	20 litros de cada clase/mes
Disolventes, pinturas e vernices	50 Kg./ano
Pilas e baterías	Ilimitado
Aerosois	10 unidades/mes
Radiografías	20 unidades/ano
Fluorescentes	15 unidades/ano
Electrodomésticos con gas CFC: frigoríficos e	2 de cada clase/ano

conxeladores	
Televisores e pantallas de ordenadores	3 de cada clase/ano
Cartuchos de fotocopiadora e impresora	40 unidades/ano

ARTIGO 6.- USUARIOS DO PUNTO LIMPO.

1. Son usuarios do Punto Limpo todos os veciños do concello de Arzúa que queiran depositar os seus residuos domiciliarios de forma selectiva, de conformidade co establecido no artigo anterior. O Punto Limpo é un servizo deseñado para assimilar residuos procedentes de particulares, non residuos industriais de empresas.

2. O Punto Limpo estará a disposición daqueles cidadáns que acheguen volumes de residuos que non superen os valores prefixados.

3. Queda terminantemente prohibido fumar nas instalacións do Punto Limpo.

ARTIGO 7.- FUNCIONAMENTO E XESTIÓN.

1. Antes de proceder ao depósito do residuo ou residuos, cada usuario deberá declarar no posto de control o contido do que quere entregar, co fin de realizar un control de orientación de vertido. O operario do centro, tendo en conta a carga declarada e a lista de residuos admisibles indicará a súa aceptación ou rexeitamento. Os usuarios do Punto Limpo deberán seguir as indicacións do operario do centro.

2. No Punto Limpo só se poden depositar os residuos mencionados no artigo 5.1. No caso de ser outros o seu depósito será estudado polo Concello.

3. Para que o servizo que se presta no Punto Limpo sexa o correcto é necesario que os usuarios acheguen os residuos previamente separados e os depositen nos contedores específicos para cada un deles.

4. Os transportistas que realicen os portes dos residuos deberán seguir as indicacións do operario do centro, que supervisará os seus labores e recibirá un certificado de que realizaron a recollida dos diferentes residuos e que teñen licenza para realizar ese traballo.

5. O encargado do Punto Limpo supervisará as operacións de depósito dos residuos para comprobar que esta tarefa se fai de forma axeitada e non se encontran mesturados con residuos tóxicos e perigosos. Tamén se efectuará unha inspección sistemática e visual en todos aqueles colectores de residuos líquidos.

6. No caso de resultar que non se efectuara a recollida, se o usuario solicitase un lugar de depósito ou tratamento, o concello poderá recomendar algún.

7. Antes de que un colector estea cheo de residuos, o operario do Punto Limpo deberá avisar á empresa encargada do seu traslado ata un xestor autorizado, consignando a operación no libro de rexistro.

8. As instalacións do Punto Limpo deben permanecer en boas condicións de hixiene e salubridade pública, polo que o operario encargarse da súa limpeza e mantemento.

ARTIGO 8.- REXISTRO.

1. O Concello de Arzúa creará un Rexistro de Entrada no Punto Limpo. Todas as operacións de depósito de residuos no Punto Limpo serán rexistradas obrigatoriamente.

2. No posto de control o operario cubrirá unha ficha na que constará a clase e cantidade de residuos entregados, así como os datos de identificación do usuario, que deberá presentar o DNI. Estes datos pasarán posteriormente ao Libro de Rexistro.

3. Todos os datos quedan, en todo caso, sometidos ás normas xerais de protección de datos persoais, sen que os mesmos poidan ser empregados para outros fins que os propios do servizo.

4. Regularmente enviarase un informe á Dirección Xeral de Calidade e Avaliación Ambiental no que se dará conta dos datos consignados no Libro de Rexistro.

ARTIGO 9 – PROHIBICIÓNS.

Quedan prohibidos os seguintes puntos:

1. Depositari residuos non permitidos por este regulamento.
2. Depositari mesturados os diferentes residuos.
3. Depositari residuos fóra do contedor específico.
4. Depositari cantidades de residuos superiores ás admisibles por este regulamento.
5. Ocultar residuos de carácter perigoso dentro de bolsas ou sacos.
6. Abandonar residuos de calquera tipo na porta das instalacións.

ARTIGO 10.- HORARIO E OUTRAS CONDICIÓNS DO PUNTO LIMPO.

1. O Punto Limpo permanecerá aberto un máximo de 20 horas semanais, **incluídos tódolos sábados que non sexan festivos, nun horario que se distribuirá por Resolución da Alcaldía** da maneira que mellor se adapten as necesidades dos usuarios. O horario de apertura deberá expoñerse nun panel informativo a entrada do recinto para coñecemento dos usuarios. No caso de que as 20 horas semanais sexan insuficientes para atender a demanda dos usuarios poderá aumentarse o número de horas de apertura, por Resolución da Alcaldía.

2. O Concello de Arzúa poderá, no seu caso, establecer mediante a correspondente ordenanza o pago dunha taxa ou prezo público pola utilización do Punto Limpo.

ARTIGO 11.- DESTINO FINAL DOS RESIDUOS.

1. O destino final dos residuos admitidos polo Punto Limpo será xestionado polo Concello segundo indique a lexislación vixente e da forma máis axeitada dependendo da natureza dos residuos. O destino final dos residuos poderá ser modificado polo Concello sempre que con isto se melloren as condicións de reciclaxe e/ou tratamento dos mesmos.

2. O Concello poderá autorizar discrecionalmente a retirada de material do Punto Limpo, sometendo a autorización ás condicións que estime oportunas. O Concello non garante a seguridade nin salubridade do produto retirado así como a súa idoneidade para o uso desexado, eximíndose de calquera responsabilidade que puidera xerarse.

3. Os residuos tóxicos e perigosos cederanse a un xestor autorizado, previo documento de aceptación dos mesmos. O transporte de residuos tóxicos e perigosos realizarase por un transportista autorizado e inscrito no Rexistro de Transportistas de Residuos Perigosos.

TÍTULO III. RÉXIME SANCIONADOR.

Artigo 12.- INFRACCIÓN

Calquera incumprimento das normas do presente Regulamento considerárase unha infracción que se tipificarán de acordo coa natureza do acto en leves e graves.

1.- Consideraranse infraccións leves:

- a) Entregar residuos non procedentes de domicilios particulares, salvo o relativo a entullos orixinados en obras menores.
- b) Depositar calquera outro tipo de residuos de orixe domiciliario que non se encuentre establecido na presente ordenanza.
- c) Depositar mesturados os diferentes residuos.
- d) Depositar residuos fora do contedor específico.

2.- Consideraranse infraccións graves.

- a) Ocultar e depositar residuos de carácter perigoso dentro de bolsas ou sacos.
- b) Abandonar residuos de calquera tipo na porta das instalacións.

Artigo 13.- SANCIÓN

1.- Os usuarios que efectúen infraccións leves estarán na obriga de restituír o dano causado podendo impoñerse unha multa de ata 300 euros.

2.- Os usuarios que comentan infraccións graves estarán na obriga de restituír o dano causado, podendo impoñerse unha multa de ata 750 euros.

3.- As sancións graduaranse atendendo a:

- a) Grao de intencionalidade.
- b) Gravidade do dano producido.
- c) Grao de malicia, participación e beneficio obtido.
- d) Irreversibilidade do dano producido.
- e) Categoría do recurso afectado
- f) Natureza do residuo.
- g) Reincidencia.
- h) Perigo para a saúde e integridade das persoas, animais ou bens.

DISPOSICIÓN ADICIONAL.

A promulgación futura de normas con rango superior ao deste regulamento que afecten ás materias reguladas no mesmo determinará a aplicación automática das mesmas e a posterior adaptación do regulamento no que fora necesario.

DISPOSICIÓN FINAL.

O presente regulamento entrará en vigor a partir da publicación do texto íntegro no Boletín Oficial da Provincia e logo de transcorrido o prazo previsto no artigo 65.2 da Lei 7/85, do 2 de abril, permanecendo en vigor ata que se acorde a súa modificación ou derogación.

En Arzúa, a 6 de setembro de 2008

O alcalde

Asdo.: Xaquín García Couso